

新鑄古今事物原始全書

新鐫古今事物原始全書九府刀泉卷之七

明臨安徐炬明夫采輯

仁和張橫仲明校

五金

軒轅時蚩尤叛葛天廬之山出金蚩尤制為劍鎧矛戟此有金之始世稱金曰黃金銀曰白金銅曰赤金凡律度量等物用銅者取其至精不為燥濕寒暑變節不為霜露風雨改形段成式酉陽雜俎云山上有薑下有銅鉄說文云鉄為黑金書曰梁州貢鉄漢置塩鉄之官張華博物志云鉛為青金紂燒鉛作粉之

始錫者銀色而鉛質古稱鉛為黑錫

玉

太白陰經云黃帝以玉為兵之始玉有七德禮記云溫潤仁也縝密以栗智也薦而不戚義也垂之如墜禮也叩之其聲清越以長其終詘然樂也瑕不掩瑜忠也孚允旁達信也故君子比德于玉夫余國出火玉光照數十步積之可以燃鼎

瓊瑤

瓊瑤玉名夏桀為瓊室瑤臺張蘊古太寶箴曰壯九重于內所居不遇容膝彼昏不知瑤其臺而瓊其室

寶貝

凡五金珠翠玩好之類皆曰寶貝者海中介虫也有
數種詳見水族古者貨貝名曰寶龜王莽作金銀龜
貝錢貝之品元龜直二千一百六十貝注云兩貝為
朋朋直二百一十六朋曰元龜故云直二千一百
六十貝也又有公龜壯貝十朋伯龜私貝十朋子龜
小貝十朋皆為龜寶易曰或益之十朋之龜是也古
以五貝為朋王莽以兩貝為朋

貨幣

史記黃帝范金為貨制金刀立五幣之始漢食貨志

云周九府圜法貨寶于金利于刀流于泉布于布束
于帛言錢之流布廣于布帛通于泉流以珠玉為上
幣黃金為中幣刀布為下幣其三幣握之非有補于
煖也食之非有補于飽也先王用以守財物以御人
事而平天下也黃金方寸重一觔錢圜函方輕重以
銖布帛廣二尺二寸為幅長四丈曰疋

錢

管子曰湯七年旱禹五年水湯以莊山之金禹以歷
山之金並鑄幣以救人困俱稱幣未稱錢也至周太
公望立九府圜法始名曰錢太昊時高陽時皆曰金

高辛時曰貨陶唐時曰泉商周曰布齊莒曰刀泉周
曰錢國語曰周景王鑄大泉徑一寸二分重十二銖
文曰寶貨吳時亦鑄大錢以一當五百秦鑄半兩錢
漢高帝八銖錢文帝四銖武帝五銖又鑄半兩錢赤
側錢以一當五漢初又有榆莢錢公孫述據蜀時廢
銅錢鑄鉄錢王莽鑄金錯刀其錢形如刀以金錯之
也杜詩金錯囊中磬張平詩美人贈我金錯刀是也
南北朝梁亦鑄鉄錢梁末又鑄鵞眼錢謹考錢貨之
行久矣禹湯之幣太公之錢皆未有文也而泉之有
文始于周景王時寶貨肉好皆有周廓注云內廓曰

好外廓曰內秦漢曰半兩五銖王莽曰貨錢貨布至
後魏孝文太和十九年鑄錢錢文曰太和五銖至孝
莊用楊福于永安二年更鑄永安五銖以年號鑄于
錢文自此始唐高祖武德四年廢五銖行開元通寶
高宗乾封中又曰乾封泉寶肅宗乾元時又曰乾元
重寶五代晉天福三年又曰天福元寶宋初錢文曰
宋元通寶又鑄太元通寶後遇每改元則皆以年號
鑄為錢文蓋錢文鑄以年自後魏孝文太和始稱曰
貨自周景王之大錢稱寶貨始稱通寶自唐高祖始
稱重寶自唐肅宗始稱元寶自晉高祖始毀佛像以

鑄錢僅始見于五代周世宗

鈔

宋高宗時女真元世祖造通元寶交鈔有一貫二貫鈔製始此

國朝有大明寶鈔與銅錢兼行其鈔即元之楮幣也劉秉中曰錢用于陽楮用于陰華夏陽明之區沙漠幽陰之域

珠

珠出南海南番為上廣西次之順宗時拘弘國貢履冰珠色似鉄持之入海可行水上南蠻有大珠大如

郊日中以艾藉之則火出開元中張悅為相有人送
悅一珠紺色有光名曰記事珠或有遺忘之事以手
弄此珠便覺心神開悟事無大小煥然曉明悅寶而
秘之墨客揮犀云孔子去衛適陳子路從行道逢一
婦採桑曰南枝窈窕北枝長婦曰夫子行陳必絕糧
孔子不答婦復曰九曲明珠穿不過回來問我採桑
娘孔子在陳果絕糧陳王以九曲珠俾孔子穿之不
得意謂桑婦有先見也使子路返問焉至前桑所婦
無覓但見桑邊泥一塼傍又有三子路曰桑者木也
泥者土也木傍有土杜也婦必姓杜三娘行也詢至

伊家問及其故三娘曰以脂塗線繫之蟻腰使蟻通之如蟻不出以煙薰之子路得其術以穿之宋劉敞詩云四海棲棲一旅人絕糧桑落死生隣自是天心勞木鐸豈關陳國有愚臣按一統志桑落在陳州界魏惠王曰寡人有徑寸之珠照車前後各十二乘者十枚齊王曰吾有四臣將照千里豈特十二乘哉

珊瑚

生大海中以鉄網沉水底侯經年取之今廣州有歲高三二尺有枝無葉漢時趙佗獻一株高一丈二尺晉王愷與石崇鬪富石家珊瑚大抵高六七尺周穆

王宴王母以珊瑚鈎擊盃而歌

瑪瑙

非石非玉刀割不動雖堅而脆其中有人物鳥獸形者最貴有錦黃花者名曰錦黃瑪瑙黑漆中有一點白者名曰合子瑪瑙黑白相間名曰截子瑪瑙黑白雜色如絲相間名曰黑漆瑪瑙此數種最貴淡水花者名曰漿水瑪瑙紫紅蒼者名曰醬班瑪瑙有海螵兔面蒼者皆價低古人云瑪瑙無紅一世貧窮

琥珀

出南番西番乃松木之精液多年化為琥珀耳其色

黃明瑩澤其性松香紅而黃曰明珀香者謂之香珀

琉璃

疏本作瑤

高麗出者性堅刀刮不動其色白厚半寸大奉國出者綠赤黃色其黑紫點燈甚明勝于角煎琉璃遠矣漢書云罽賓國出赤白青黃紅綠黑紫縹紺十種其玻璃出南番有紫白二色似水晶者礮開內有兩點花色是真或云即火燄珠向日可以取火

碑礮

生西國玉石之類形似蚌蛤有文理可飾殿堂梁檐七寶之一也

琅玕

生蜀中平澤又生海中者青色按禹貢云雍州厥貢
鏐琳琅玕爾雅云西北之美者有崑崙鏐琳琅玕孔
安國郭璞皆云石之似珠者山海經云石之美者

雲母

出土石間作片成層可析開之明滑光白為上江南
生者多青黑色葛洪抱朴子云雲母有五種五色並
具多青者名雲英多赤者名雲珠多白者名雲液多
黑者名雲母有青黃二色者名雲石

鍾乳

出泰山及道韶峽州生岩穴陰處溜山液而成中空相通長者五六寸如鵝翎管樣有石竹茅山乳之別

珊瑚砂

西戎出者塊大如拳河東陝西出者雜碎如麻豆又夾沙石人生食之化心為血傷人腸胃

雄黃

生成都山谷與雌黃同山而生其陰山有金金精薰則生雌黃其色如金而以雲母甲錯雜此畫家所重

水銀

出秦州商州土人採得砂石皆大塊如升斗碎之乃

可燒鍛故西來水銀極多廣雅謂之瀕丹灶家謂之
永飛煉即為輕粉

石英

今新安有之長五六寸者佳黃色如金在端者名黃
石英赤端白後者名赤石英青端赤後者名青石英
黑澤有光者名石英紫石英會稽嶺南俱出之

石燕石鱗

石燕出永州析陽縣江傍沙灘上形似蚌而稍長其
寶石也或云生山洞中因雷雨則飛出隨于沙上而
化為石焉產婦两手各握一枚須臾子下唐詩云石

燕拂雲晴亦雨江豚吹浪夜還風即此其石嶰出嶺
南近海州郛躰質石也而形與璣相似

空青

空青狀如楊梅一名楊梅青腹中空破而有漿者最
難得亦有如鷄子大者其曾青與空青相同而理色
亦無異但其形青圓如鉄珠色白而腹不空耳

丹砂

辰州出者佳故又名辰砂生深山石崖間土人穴地
數十尺始見其苗乃曰石耳謂之朱砂床砂生石上
其塊大如鷄子小者如石榴子周禮以丹砂石膽雄

黃磬石磁石為五毒愚按金石之類頗繁本草載之
詳矣奚容余之喋喋也姑采其日常所見聞者以備
分門集類云爾今聊書其名色焉夫金之美者曰鏐
玉未經琢曰璞魯之寶玉曰璠璣玉之瑞者曰璧玉
之美曰琳曰球曰瑜曰琰曰琮玉之色赤者曰珪半
珪曰璋周禮以赤璋禮南方以白琥禮西方石之似
玉曰玢曰珉曰璫其石類曰滑石曰石膽曰石綠曰
石膏曰磁石曰凝水曰陽起曰磬石曰代赭曰金星
曰花乳曰茅山石曰紫班石曰密陀僧曰石硫黃
九府乃泉卷七終 事物原始卷九終

新鐫古今事物原始全書卷之八

明

臨安徐炬明夫采輯
仁和張橫仲明校正

冠

通典曰上古聖人衣毛帽皮中古聖人見鳥獸之冠
角乃作冠至黃帝始以布帛為之蔡邕獨斷曰天子
之冠名曰通天冠杜佑曰宋時更名平天冠三禮圖
云三代冠名夏曰母追音無商曰章甫周曰委帽俱以
緇布為之周時亦名玄冠六帖曰孔子作緇布冠誤

矣崔豹古今注曰漢平帝元始五年作進賢冠乃古
之緇布冠之遺像即今之金線冠也乃儒者之服漢
制公卿列侯冠三梁二千石冠二梁下大夫冠一梁
以別貴賤淮南子曰楚文王好服豸冠楚人效之豸
冠之制始此注云獬豸神羊也能別曲直與服志云
晉惠帝時郎中戴鵩冠注云鵩山雞也又名錦
雞周時侍御史名柱下史冠法冠其後以鉄為柱取
其不撓之義孔帖云知天文者戴鵩冠以鵩能知天
將雨也戰國時趙武靈王好胡服始置貂蟬冠一曰
武弁也即大冠其像金蟬左貂侍中冠之始皇併趙

以此冠賜侍中續事始曰鶡冠乃武冠也今梨園武冠上插毛者即其遺制亦始于楚有楚人自號鶡冠子衣蔽履以鶡為冠莫知其名著書言道家事注云鶡似雉勇而善聞不死故用其尾以飾武冠唐時野夫戴黃冠衣草服張道士通古今寄迹老子法中韓愈詩云詣闕三上書臣非黃冠流文天祥有黃冠歸故鄉之句宋時何尚之致仕戴鹿皮冠沛公戴竹皮冠原憲戴樺皮冠

冕

通典曰黃帝作冕垂旒目不視邪色也充續於耳耳

不聽邪言也說文云冕有五制古者大夫以上至天子皆有冕惟旒之多寡以別之宋英宗朝李育上言制冕以周官為本凡十二旒間以采玉加以紃灋笄瑱之飾自東漢至唐而史官名儒記述前制皆無珠翠犀寶之飾蓋謂明水大羹不可以衆味和雲門咸池不可以新聲間袞冕之服不宜以珍恠累也許慎說文云旒垂玉也乃冕之飾也冕制有五一曰袞冕王十二旒上公九旒二曰鷩旒王九旒三公八旒侯伯七旒三曰毳冕王七旒孤卿六旒子男五旒四曰布冕王五旒大夫及諸侯之孤各四旒五曰玄冕王

三旒陸佃云王之五冕皆十二旒杜佑曰天子十二旒至地諸侯九旒至軫大夫七旒至轂士三旒至肩說文云古旒皆用玉三國時魏明帝改用珊瑚珠

弁

說文云即冕屬周曰弁夏曰收商曰皐詩云載弁俅俅禮云皮弁素積史記云三王共皮弁

組綬

禮曰天子佩白玉而玄組綬諸侯山玄玉而青組綬謂之綬者何也蓋綬乃貫佩玉取相承受之義耳董巴輿服志曰戰國時解去綬佩留其絲縫以綵紺連

結于祿今之綬帶起于戰國而綬名始于三代其青
絲綬名曰綸

佩

輿服志曰古者君臣皆佩玉三代同始于夏后氏至
周始制其等禮記天子佩白玉公侯山玄大夫水蒼
世子瑜玉士孺玟是也其玉佩名曰玦白虎通曰君
子能斷則佩玦荀子云君子之于人絕交以玦反絕
以環君之逐臣賜環則反賜玦則絕

帶

穆王北征舍于珠澤珠澤之人獻白石帶天子賜黃

金六環唐定為四品服太祖曰玉不離石犀不離角可貴者惟金乃作金裘方圓帶以賜政府御仙花帶以賜侍臣世稱笏頭荔枝者此其始也二儀實錄曰古有韋帶乃揅垂頭至秦二世始名腰帶唐高宗令向下揅垂頭取順下之義上元元年自三品官至庶人各有定制始以金玉犀銀瑜鉅銅鉄為飾

魚

實錄曰三代以韋為之名曰等袋魏時謂之龜唐高祖給隨身魚三品以上則飾金五品以下則飾銀故名魚袋武后改曰龜後復為魚真宗神龍初賜紫則

給金魚賜緋銀魚不限品也唐會要曰高宗咸亨三年京官四品五品皆佩銀魚武后久視元年三品飾金四品銀五品銅神宗元豐初用玉魚以副金帶金魚以副玉帶韓文公詩曰不知官高卑玉帶懸金魚

符節

說文云符信也漢制竹箭五枝長五寸鐫刻篆書與郡守各分一半右留京師左以與之信陵君即魏公子無忌也竊兵符使朱亥擊晉鄙漢文帝為銅虎符當發兵遣使至郡合符相合乃受之唐高祖頒銀莧符後改銅魚符以發兵西京北都留守給麟符東方

青龍符南朱雀符西騶虞符北玄武符出車服志節
與符皆所以示信也但經史皆作節今亦附此以竹
為之柄長三尺以旌牛尾為旄三重守邦國者用玉
節守都鄙者用角節邦國之使出使于山國用虎節
土國用人節澤國用龍節皆金也門閭用符節貨賄
用璽節道路用旌節皆有期以反節凡通達于天下
者皆有節出禮記漢初節純用赤按周禮地官之屬
掌之有玉角龍虎至漢節始加旄宋朝會要曰金節
隋制也以八層黃繡龍袋籠之周禮六節山國用虎
土國用人澤國用龍三節皆金為之按周禮地官之

屬掌節有五角虎人龍符璽旌等節漢文帝有旄節之制西京雜記曰漢大駕鹵簿有節十六在左右則漢時始用為儀仗也筆談曰古節如今之虎符其用有璚璋龍虎之別漢人有持節乃古旄也然則節自周起而旄則始于漢也呂氏春秋曰墨者田鳩見楚王王悅之得將軍之節將軍賜節已見于戰國時孟詵錦帶前書曰以竹為之使人執導之隋書曰後周制有旌節畫白獸而析羽於其上唐車服志曰唐高祖初大將出則賜旌以顯賞賜節以顯殺旌以絳帛五丈以粉畫虎銅龍一首纏緋幡紫纁為袋油囊為

永節懸畫木盤相去數寸隅垂赤麻餘與旌用此蓋
唐制也管子曰舜有進善之旌則旌乃有虞氏始也
世本曰黃帝始作旂

璽印

春秋運斗樞曰舜為天子黃龍負圖封其兩端有璽
文曰天皇符璽後漢祭祀志曰三王雕文詐偽漸興
始有符璽以檢奸萌是璽肇于三代應劭曰璽者備
也古者尊卑共之衛宏曰秦以前民亦以金玉為印
自始皇得卞和之璞刻之使李斯篆文曰受命于天
既壽永昌名曰傳國璽群臣無敢用王矣章衡曰唐

武后改傳國璽曰寶七雄之時臣下之璽始稱曰印
史記云蘇秦佩六國相印是也漢三公以下有金銀
銅三等宋時惟節度觀察防禦等官賜之續事始曰
州縣之印始于春秋之時商鞅書曰法令之長印以
封券則有司之賜印已見于秦孝公之時漢時諸侯
王金印橐駝鈕文曰璽丞相列侯金龜鈕文曰章御
史大夫金印紫綬文曰章中二千石銀印龜鈕文曰
章千石四百石皆銅文曰印晉輿服志相國太尉三
公御史大夫皆金章紫綬二千石以上皆銀印青綬
光祿大夫凡六百石以上皆銅印黑綬博士御史謁

者郎比二百石以上皆銅印黃綬而條印則始于北齊杜佑通典曰北齊有督攝萬機之印以木為一列長一尺二寸廣二寸五分背上為別劍長九寸厚一寸廣七分腹隱起篆文曰督攝萬機四字今之條印關防始于此也

券

漢書云券者符契也漢高帝以鉄鑄之以朱書之其文曰泰山若礪黃河如帶國以永存爰及苗裔用以賜功臣國之所以示信也名曰丹書鉄券注云以木牘為要約之書以刀剖之屈曲如犬牙唐以前館驛

並給往來開元中始給紙券即今勘合之類出青箱
雜記

牙門

宋朝會要曰古者天子出建大牙今制錯綵為神人
象中道前後各一左右道五門而一門二旗蓋取周
制立旌表於門及天子五門之制

龍旗

宋朝新制也謂風伯雨師雷公電母各一五星五左
右攝提二北斗一也

攝提旗

宋建隆四年將郊祀陶穀建議取天文北斗角攝提之象作攝提旗及北斗二十八宿十二辰五嶽五方神五鳳四瀆等旗

龍墀旗

唐禮令無文開寶新禮通加謂天下太平一五方各一君王萬歲一日月各一

負圖旗

宋朝會要曰建隆中郊祀太祖詔造大黃龍負圖旗一大神旗六日旗一月旗一君王萬歲旗一天下太平旗一師子旗二金鸞金鳳旗各一五龍旗五九二

十一旗皆有架南效用之大黃龍負圖旗陳于端門
前餘二十旗悉列于宿頓宮前如遇朝會冊禮亦陳
于殿庭也

玉兔旗

宋會要曰乾德六年太祖親郊有司請以國初以來
祥異著於旗章遂作金鸚鵡玉兔象等旗蓋謂建
隆二年隴州楊勲獻鸚鵡鄆州姚光輔獻白兔及馴
象自為三旗也

合璧旗

漢書律歷志曰漢武帝選治曆者造太初曆復使淳

于渠陵覆曆晦望弦朔最密太初元年十一月甲子
望冬至七政周起牽牛初度日月如合璧五星如連
珠大饗明堂記曰宋朝取此義以禮物謂日月合璧
旗一以苴文旗二夾之五星連珠旗一以祥雲旗二
夾之

引駕旗

明堂記曰引駕旗唐禮令無文唐開元通禮新加謂
十二辰天王二等旗也

五嶽旗

大饗明堂記曰五嶽五方神五龍五鳳四瀆神等旗

乃宋朝所制

五方旗

通典曰黃帝振兵始設五旗黃帝內傳曰帝制五彩旗指顧向背黃帝出軍決曰攻伐作五彩牙旗青引東赤引南白西黑北中黃是也

罕

通典曰武王克紂百夫荷罕旗以前驅後漢有九游雲罕西京雜記曰漢大駕有罕罕在左右則是漢始制此二物晉輿服志曰五時車後次華蓋中道左罕右罕宋朝會要曰象罕為天街故為前引皆赤負金

銅飾朱藤結網金獸面單方上有二螭首銜紅絲拂
單如圓扇

黃麾

通典曰黃帝振兵設五旗五麾之始宋會要曰麾古
有黃朱縹三色漢鹵簿有左右黃麾今制絳帛為之
如幡采成黃麾字古今注曰麾所以指麾武王執白
旄指揮是也乘 以黃諸王以朱刺史二千石以縹
旂常

周禮巾車玉輅建太常按司馬法章曰夏以日月上
明商以虎上威周以龍上文釋名曰日月為常畫日

月於旗端言常明也自夏后始奚仲為夏車正加以
旂常於是旂就有差用明尊卑之別

華蓋

崔豹古今注曰黃帝與蚩尤戰常有五色雲氣金枝
玉葉止于帝上有花蔕之象故作華蓋筆談曰輦後
曲蓋謂之簀兩旁夾扇通謂之扇簀皆繡彩亦有銷
金者即古之華蓋也

曲蓋

古今註曰曲蓋太公所作武王伐紂大風折蓋太公
因折蓋之形而始制曲蓋

方繖

宋會要曰方繖古張帛避雨之制今有方繖大繖是繖之制始于古之張帛也

雉扇

古今注曰起於商高宗有雉雉之祥服章多用翟羽周以為王后夫人之服飾車之有翟織雉羽為扇以翳風塵漢乘輿服之後以賜梁孝王魏晉以來雉諸王皆得用之

朱團扇

宋朝會要曰本漢時長柄扇宋孝武時詔王侯鄣扇

不得用雉尾故王公以下有朱團扇疑自此始也

俾倪

宋朝會要曰漢乘輿用之如花蓋而小疑漢始制之也

儀鍠

宋會要曰鉞屬也秦漢有之唐用為儀仗古今注曰秦改鉞鉞作鍠乃秦制也

班劍

本漢朝服帶劍取五色班闌之義開元禮彖纂曰漢制朝服帶劍晉代之以木謂之班劍宋齊謂之象劍

儀刀

二儀實錄曰儀刀自東晉多虞遂以木代之以脩威儀即衙刀也宋會要曰儀刀以銀飾之宋時王公亦給之

御刀

宋會要曰晉宋以來皆有之其制黑鞘金花銀飾靶紫絲絲帔錯

鷄竿

楊文公談花曰杜鎬言金鷄肆赦不知始于何代關東風俗傳曰宋孝王問司馬鷹之曰後魏北齊赦日

立金鷄其義何取膚之曰按海中星占云天鷄星動
為有赦蓋王者以天鷄星為度隋書云北齊赦日令
武庫設金鷄及鼓于闔門之右搥鼓千聲宣赦則建
金鷄或云起自西涼呂光未知孰是究其旨蓋西方
主兌兌為澤鷄者巽神巽主號令故合二物置其形
揭于長竿使衆觀之唐百官志曰中尚令赦日立金
鷄于仗南鷄用黃金飾口銜絳幡承以綵盤維以絳
繩教坊小兒得鷄首者官以錢購或取綵幡而已蓋
此事始于唐也

白幹槍

宋會要曰稍也唐時羽林所執制同稍而鉄刃上綴朱絲拂隋志云齊梁四代儀中亦有此物疑晉宋以後以為衛仗也

鳴鞭

唐及五代有之周官條狼氏執鞭趨群之遺法也雖始於唐亦本周事也

毬杖

宋會要曰毬杖非古制蓋唐世尚之以資玩樂

氅

宋會要曰氅本緝鳥毛為之唐有六色孔雀大小鵝

毛鷄毛之制隋書禮儀志梁武受禪於齊多循其像
物御仗有赤氅青氅之別

新鐫古今事物原始全書卷之十終

新鐫古今事物原始全書卷之九

臨安徐炬明夫采輯

仁和張樸仲明校正

車

呂氏春秋曰奚仲作車世本亦曰奚仲作車山海經曰番禺生奚仲奚仲生吉光始以木為車郭璞注云世本言奚仲作車又云吉光明其父子創意也古史考曰黃帝作車引重致遠其後少昊駕牛奚仲駕馬炬按奚仲為夏時之車正不過改制之妙耳又按劉昭補注後漢書曰服牛乘馬以利天下所起遠矣豈

奚仲所為乎呂氏春秋及山海經世本皆誤耳古史
考所說是也易繫辭言黃帝服牛乘馬引重致遠益
取諸隨則車宜黃帝始明矣

鹵簿

炙轂子曰車駕行則有羽儀導護謂之鹵簿自秦漢
始有其名後漢胡廣作天子出行鹵大楯也所以扞
敵部伍之次皆著之簿儀其五兵獨以楯為名者行
道之時甲楯之外餘兵在內故但言鹵簿五禮精義
曰鹵大楯也以大盾領一部之人故名鹵簿

建旂

沈約輿服志曰車服以庸著在唐典夏后氏建旌旗辨其尊卑通與曰夏后氏使車正奚仲建旗旂旒尊早上下各有等級則車輅之建旂常始于禹也

駕頭

筆談曰正衙法座香木為之加金錦四足墮角其前小偃織藤冒之每車駕出幸則使老內臣馬上抱之名曰駕頭

駕六

昔人皇氏駕六羽未言駕六馬按夏書五子之歌曰若朽索之馭六馬駕六之制宜自夏始逸禮王度記

曰天子駕六馬諸侯四大夫士二庶人一秦并天下自以為水德亦駕六馬

黃鉞

古今注曰黃鉞金斧車三代用之斬金以黃為乘輿之飾武王以黃鉞斬紂故王者以為戒宋朝會要曰黃鉞車漢制乘輿建之通典以為晉制

金根

古今注曰金根車即殷之瑞山車成湯郊祀有山根之瑞又名桑根車桑根黃如金故曰金根即殷之輅也秦并天下閔三代之輿服倣作是車

鸞旗

鸞旗車漢制也編以羽旄列繫幡傍胡廣曰以銅作鸞鳥立于車衡宋會要曰漢制為前驅上載赤旗旗上繡之以鸞通典亦曰鳶旗車漢制也繡鸞于旗挿旗于上以為前驅

白鷺

通典曰白鷺車隋制也一名鼓吹車上施層樓樓上有翔鸞棲馬車柱之杪剡木為鷺以啣鵝毛筒唐時御史亦以鷺羽飾車取鷺見水中魚能察微隱之義

乘

通典曰昔人皇氏乘雲駕六羽出谷及五龍氏乘龍上下以理此乘之始也周禮四馬為乘

豹尾

古今註曰豹尾車周制也所以象君子豹變之義惟乘輿得建之通典曰漢制大駕法駕出屬車最後一乘懸豹尾楊雄曰大駕屬車八十一乘作三行尚書御史乘之最後一乘懸豹尾按徐廣淮南子曰古之軍正之官執豹皮以正其衆禮記前有士師則載虎皮

象車

西京雜記曰漢朝輿駕有象車鼓吹十三人晉輿服志曰漢鹵簿象車最在前杜佑通典曰晉武帝平吳南越獻馴象詔作大車駕之大駕將行使越人騎象車先試橋梁而梁朝象車亦居先設木蓮花座金蕉葉宋朝亦然則象車為先導自漢始也

輅

周禮巾車氏掌公車之政令辨其用與其旗物而等叙之治其出入王之五路一曰玉路錫音賜樊纓十有再就建太常十有二游以祀二曰金路鈎樊纓九就建大旂以賓同姓以封三曰象路朱樊纓七就建大

車輅考
赤以朝異姓以封四曰革路龍勒條纓五就建大白
以即戎以封四衛五曰木路前音樊鵠纓大大旄以
田以封蕃國

大輅

史記云黃帝命邑夷作大輅以行四方王后之五輅
曰安車輦車重翟車厭翟車翟車

五輅

隋書禮儀志曰輅有虞氏謂之鸞車夏后氏謂之車
輅商謂之大輅周謂之乘輅按此謂之輅者自商人
始也周人初制五輅用金玉象革以飾之後漢加扈

文晉兩廂加鷗翅亦謂之鷗車注云旂旗于左加祭
戟于右皆橐藏之戟韜以綃纈

五牛輅

通典曰東晉過江副車遺缺有事權以馬車代之建
旗于上後制五色木牛象五時車立旗于背行則使
人輿之牛取負重致遠而安旗常纏而不舒所謂德
車綏權是也晉書輿服志曰五牛旗乃平吳後所造
以五牛建旗車設五牛青赤在左黃在中白黑在右

鳳輦

通典曰唐輦有七一曰大鳳輦前世無文疑唐所造

也今止曰鳳輦

大安輦

宋會要曰乾興元年禮儀院奉旨制造皇太后御座檐子乞詳定制度所稱名目詔以大安輦為名

芳亭

通典曰唐制輦七其五曰芳亭輦蓋始為大駕之羽衛也

安車

續事始曰安車立車皆漢制也安車者可坐者也謂之步輦即夏桀所駕人車古人譏之今廢人用眠輦

罪莫大焉列女傳云立輜無駢是婦人亦三也

羊車

通典曰羊車晉制也宋會要曰古輦車也亦名畫輪車駕以牛隋駕菓下馬宋亦駕二馬景祐五年賈昌朝上言羊車本漢晉之代乘于後宮隋大業初增以金寶之飾駕以小駟馭以卵童自是以來遂為法從隋禮儀志曰漢氏或人牽或駕菓下馬晉武帝太康二年詔選孫和宮人五千入宮帝既平吳頗事遊宴常乘羊車恣其所之即便宴寢宮人競以竹葉挿戶塩汁洒地以引帝車然漢代已有此車晉武偶取乘

于後官非特為掖庭制也然則羊車漢儀非是晉始也

明遠

宋會要曰明遠車古四望車也駕以牛乾德元年改仍駕四馬其制如屋上層四面垂簾通典曰齊為四望車亦曰阜輪車以賜貴臣按齊已上無文此為齊制明矣又曰唐始駕四馬也

進賢

安車也通典曰周致仕之老及后乘之漢有五時安車各以方色宋會要曰進賢車古安車也

香鑪香輿

宋會要曰香鑪唐制也通典曰唐有香輿大駕先五輅行

儀馬

今導駕有御馬分左右自漢有之西京雜記漢朝輿駕祀甘泉汾陰用罽毼左右及節十六後乃有御馬三則儀馬之設自漢始也

十二神

宋會要曰唐開宝新定禮所增明堂記曰十二神輿載十二月之神象自鉦鼓漏鍾及神輿舊禮今無文

開室通禮新增之

相風

拾遺記曰皇娥游窮桑之浦有神童稱為白帝子與
皇娥譙戲沈於海以挂枝為表結芳茅為旌刻玉為
鵠置于表端言知四時之候今之相風鳥亦其遺像
古今注曰相風乃夏禹所作周遷輿服雜事曰周公
作相風即鳴鳶之象禮曰前有塵埃則載鳴鳶後代
改為烏沈約輿服志曰相風鳥秦制也按黃帝內傳
有相風鳥之制當是黃帝始也

皮軒

通典曰皮軒車漢制以虎皮為軒作前驅之車取尚
禮前有士師則載虎皮之義也

崇德

宋會要曰崇德車本秦避惡車也上有柅弧棘矢所
以禳却不祥上插黃旗太卜令在車執旗古今注曰
辟惡車秦制也柅弓蒿矢所以袪除不祥故曰辟惡

記里

古今注曰大章車所以識道里一名記里起于西漢
按黃帝內傳曰玄女為帝製司南車當其前里記車
居其右其制蓋黃帝始也非漢所作也

鍾鼓輿

宋會要曰鍾車鼓車乃隋制也隋時大駕羽衛有行漏車鍾鼓等車今為輿

小輿

通典曰按小輿即今之犢車駟車之流宋制小輿形如輅車小行幸則乘之

副車

禮記有貳車鄭康成云副車又有佐車然則副車亦周制也通典曰秦平天下以諸侯之車為副又周禮有戎車五倅有戎輅及廣闕革輕等車之倅倅者副

也則輅車有副周制然也

耕根

通典曰漢制如副車有三蓋一曰芝車置轡耒耜之
旅上親耕所乘晉駕駟隋以青質羽葆雕裝軾平青
囊盛耒耜而加之也

銅車

太子之輦曰銅車陸機詩云撫劍遵銅車其制始于
漢

指南

鬼谷子曰夷人肅慎還國周公恐其迷跡造指南車

送之古史考亦云周公作或曰管仲作崔豹古今注
曰周公致太平越裳氏重譯來獻使者迷其歸路周
公錫以軒車五乘皆為司南之製黃帝內傳曰玄女
為帝製司南車當其前與蚩尤戰于涿鹿之野蚩尤
作大霧彌漫三日衆軍皆惑帝令風后法斗機作指
南車以別四方

長簷

長簷車梁制也梁朝全盛時貴游子弟駕長簷車著
高齒木屐坐棊枰方褥凭班絲隱囊即今之轎帷或
絹或布即古之中車也用油紙為幔以蔽風雨即油

碧車之遺制也今時逍遙轎之飛簷即梁時之長簷車也出顏氏家訓

鉄車

史記云鉄車者一名檀車即戰國時田車之鉄轂火牛兵車也詩云赴敵霜金劍追奔電鉄車是也

飛車

南蠻傳云奇肱國有飛車其人能從風遠行

追鋒

高貴鄉公好士公性急欲望外官特給車一乘武賁五人每有宴集奔馳而至號曰追鋒車

皂蓋

古時三公有勲德者車上加皂蓋烏漆輪黃金雕裝青油幢朱絲絡即漢宣帝賜霍光皂蓋車是也

輜重

漢光武紀云載軍糧什物雜厠等件之車名曰輜重即周時所謂輜車也

鹿車

宋時有鹿車歐詩云白首歸乘一鹿車又詩云白鹿銜花駕小車

說車

通典曰夏后時謂之輦商曰胡奴車周曰輜車許慎
說文云挽車也漢書云駕人以行曰輦秦始皇去其
輪以人荷之謂人在前使引之也漢代遂為人君之
乘隋時亦稱輦

輦車

今之柴車羊頭車即左傳所謂輦車也

偏箱

晉馬隆攻鮮卑以山踞狹隘乃作偏廂車地廣則為
鹿角車

星輅

漢申公傳曰出使之小車名曰星軺史記申公乘軺至京是也

短轅

史記云晉時有短轅車晉王導妻曹氏性妬導密置衆妾于別館曹氏知而將行導遽命駕短轅車壓尾柄驅牛而進司徒蔡謨戲曰朝廷欲加公九錫導謙退而已謨又曰不聞餘物惟有短轅車長柄壓尾導大怒

江州車

孔明造木牛流馬以運軍餉蓋巴蜀道阻便于登陟

故耳木牛即今之小車之有前轆者流馬即今之獨推者而民間謂之江州車子按後漢郡國志巴郡有江州縣是時劉備全有巴蜀之地疑孔明創始于江州縣耳

擔子

舊唐書輿服志曰開成未定制宰相三公諸司官及致仕官疾病官皆許乘擔子如漢魏載輿之制按唐乾元以來始用兜籠以代車輿疑自此又為擔子之制也亦漢魏時載輿步輿之遺事耳

兜子

一名兜籠巴蜀婦人所用乾元以來多以兜籠代車
輦唐之兜籠卽今之兜子蓋其制起于巴蜀而用于
中朝自唐乾元以來也

舟

呂氏春秋曰虞姁作物理論曰化狐作墨子曰工倕
作山海經曰番禺作許慎說文曰共鼓貨狄作注曰
皆黃帝臣也易曰黃帝剡木爲舟剡木爲楫是黃帝
始矣其樓船始于晉王濬代吳造舟以木爲城上起
以樓馳馬往來按光武時雖有泛樓船号濟汾河之
歌考之群書未聞有起樓馳馬之盛宋太祖于朱明

門外造樓船百艘選卒習戰池中號水虎捷而龍舟
始于隋煬帝幸江都之時亦效吳夫差以錦為帆馬
而艖衝開艦始于三国吳中實以薪草膏油乘風發
火以鑿曹兵于赤壁而梁時陸納始造青龍白虎大
艦衣以牛皮高十五丈馬前蜀王北狩始造龍舟登
舸杜牧之詩云西子下姑蘇一舸過鴟夷宋詔興二
年王彥恢制大艦旁設四輪每輪八楫日行千里出
中吳繫年錄史記曰梁時制鱖魚舟于天泉池即今
時行狹而短之舟是也王子年拾遺記云秦始皇好
仙有宛渠之民乘螺舟而至其形如螺沈行海底水

不浸入杜陽編云隋處士元藏機至海中一洲島人
曰此滄州也去國已數万里此洲方千里人多不死
藏機思歸洲人制凌風舸送之激水如箭首登之鳥
名曰鵲峽人呼船頭把篙相水道者為長年稍工曰
三老宋時呼為篙工水師今呼水夫水手又云稍公
稍婆其稍婆與客通曰包稍正船之木曰柁定船之
鉄曰楫用手搖曰櫓以手撐曰篙御風之幔曰帆掛
帆之木曰櫓王荊公詩大舟如山起牙櫓綰紗記錦
帆開牙櫓動是也舟旁撥水者短曰櫓長曰櫓用以
進水曰槳又云前推曰槳後曳曰櫓赤壁賦桂櫓兮

蘭槳是也小舟曰舠舡漁舟曰漁舠海舟曰舶緹竹
夾箬以覆舟車曰蓬王子年拾遺記曰黃帝夏來桴
以為舟楫則黃帝時先以用桴濟人矣注云小曰筏
大曰桴以竹木為之按岑彭傳乘舫簞以下江關東
竹木而浮水上即今之竹簞木簞也竹筏一名方谷
風云就其深矣方之舟之

橈音絕與輶同

書曰夏禹水乘舟陸乘車山乘櫟泥乘輶漢書作橈
以板置泥上橈形如箕又云禹治水時山行乘橈用
鉄如錐以施屐下疑即今之屐下用釘之木屐也

橋

橋曰梁又曰杠通車行者曰輿梁徒行者曰徒杠許慎說文云水橋謂之梁大橋謂之輿梁方言曰浮橋詩云造舟為梁益州以竹索為橋其名曰笮橋今時惟有福建泉州府洛陽橋在晉江縣東北跨洛陽江宋郡守蔡襄建累址于淵驅水為四十七道長三百六十丈廣一丈五尺蔡若水詩石架長橋跨海成論功直得萬安名安平橋亦在晉江縣西南石井鎮宋紹興中趙令佺建長八百餘丈出一統志

車駕九卷終

事物原始卷之十終